

**ԱԶԳԱՅԻՆ ԱՆՎՏԱՆԳՈՒԹՅԱՆ ԱՊԱՀՈՎՄԱՆ
ԳՈՐԾԸՆԹԱՅԻ ՎԵՐԱՀՄԿՈՂՈՒԹՅՈՒՆԸ
(հնարավոր իրավիճակների կանխատեսումը)**

Մյունիք Թաղևոսյան

Քաղաքակրթությունների գոյատևման բոլոր փուլերում կյանքի, բարօրության և անվտանգության բարձր մակարդակի ապահովումը կարևորագույն նպատակ է հանդիսացել: Հողվածում փորձ է արվել ներկայացնել ազգային անվտանգության ապահովման գործընթացում մեծ կարևորություն ունեցող վերահսկողության և հնարավոր իրավիճակների կանխատեսման իրականացման հայեցակարգային դրույթները:

Աշխարհաքաղաքական ներկայիս իրավիճակում առաջ են գալիս յուրաքանչյուր ազգի ու պետականության գոյատևմանը և մրցունակ զարգացմանը խոչընդոտող բազմաթիվ վտանգներ և սպառնալիքներ: Դա ստիպում է հասարակական կյանքի կենսագործունեության կառավարման հիմքում դնել այդ սպառնալիքների բացահայտման, կանխման և այդ ընթացքում առաջացող հնարավոր բացասական ազդեցությունների ու հետևանքների վերացման խնդիրների լուծումը և առաջադրում է այնպիսի կառուցվածքային հիմնախնդիրներ, ինչպիսիք են տարածաշրջանային և համաշխարհային մակարդակներում ազգային համակարգերի տեղի ու դերի որոշումը և պահպանումը: Նշված վտանգների և սպառնալիքների դիմակայման համար ազգը պետք է ունենա իր կենսաձևին համապատասխան ազգային անվտանգության (ԱԱ) ապահովման արդյունավետ համակարգ:

Հաշվի առնելով այն հանգամանքը, որ ԱԱ ապահովման հիմնական պատասխանատվությունը դրված է պետության՝ որպես քաղաքական համակարգի կենտրոնական ինստիտուտի վրա, ակնհայտ է, որ ազգային անվտանգության առջև ծառայած խնդիրները հաջողությամբ լուծելու համար առաջին հերթին անհրաժեշտ է ունենալ բարձր արդյունավետությամբ և արհեստավարժությամբ աչքի ընկնող պետական կառավարման համակարգ՝ օժտված պետական կառավարչական որոշումների ընդունման, գործարկման և վերահսկման արդյունավետ մեխանիզմներով:

ԱԱ ապահովման գործընթացը դիտարկելով որպես կառավարման գործընթաց՝ նախ խնդիր է առաջանում ապահովել վերջինիս իրականացմանն անհրաժեշտ հիմնական գործառույթների առաջնահերթությունն ու ամբողջականությունը: Հիմք ընդունելով կառավարման գործառույթների տարանջատման դասական մոտեցումը՝ ԱԱ կառավարման հիմնական փուլերը կարելի է ներկայացնել հետևյալ կերպ [1]՝

- ԱԱ հիմնարար արժեքների և նրա դեմ ուղղված սպառնալիքների բացահայտում ու հստակեցում,
- ԱԱ համակարգի բաղադրամասերի առանձնահատկությունների և դրանց միջև առկա կապերի բացահայտում,
- ԱԱ ապահովման համար անհրաժեշտ ինստիտուցիոնալ համակարգի և գործունեության ուղղությունների հստակեցում,
- ԱԱ ապահովման գործընթացի վերահսկողություն և իրավիճակի կանխատեսում:

Այսպիսով, վերահսկողությունն ու կանխատեսումը ԱԱ իրականացման գործընթացի եզրափակիչ գործառույթներն են, և հենց դրանք էլ պարբերականություն են հաղորդում ԱԱ կառավարման ողջ գործընթացին: Այս փուլն առավել մեծ կարևորություն է ձեռք բերում՝ հաշվի առնելով այն հանգամանքը, որ ԱԱ ապահովումը պետք է իրականացվի առաջին հերթին բոլոր սպառնալիքների, նպատակների ու առաջնայնությունների վերհանման և հստակեցման, ինչպես նաև դրանց վրա հիմնված ԱԱ ռազմավարության մշակման և համապատասխան գործառույթների հետևողական իրականացման միջոցով ու կրի ցիկլիկ բնույթ:

Այսինքն՝ նշված գործառույթների ապահովման համար անհրաժեշտ է իրականացնել ԱԱ համակարգի վրա ազդող գործոնների շարունակական (պարբերական) մոնիթորինգ, որը վերլուծության ձևերի և ընթացակարգերի համալիր է, ինչն ապահովում է կանխորոշված, սահմանափակ քանակի ցուցանիշների պարբերական դիտարկում, ամրագրում և վերլուծություն:

Ուսումնասիրության օբյեկտի բնույթից կախված՝ մոնիթորինգի իրականացման համար հիմք են հանդիսանում սոցիալական կառավարման, ինֆորմատիկայի, մաթեմատիկական և տնտեսագիտական վիճակագրության, կանխատեսման և վերլուծության տեսությունների հիմնադրույթները [2, c. 481]: Մոնիթորինգային հետազոտություններն առավել հաճախ օգտագործվում են բաղադրամասերի ներքին կապերի և հարաբերությունների մեծ բարդությամբ աչքի ընկնող համակարգերի ուսումնասիրության ժամանակ:

ԱԱ-ն հենց այդպիսի համակարգ է, որն իր վրա է կրում արտաքին և ներքին միջավայրերի բազմաթիվ գործոնների ազդեցությունը՝ պայմանավորված հասարակական և պետական ինստիտուտների, ինչպես նաև մարդկային գործունեության հետ: ԱԱ մոնիթորինգը պետք է ուղղված լինի ԱԱ ապահովման գործնական նպատակների, սպառնալիքների և փոփոխությունների ընթացիկ, միջին և հեռանկարային կանխատեսումների իրականացմանը, ինչպես նաև առաջարկի մեթոդներ դրանց դիմակայելու և հոգուտ երկրի օգտագործելու համար: Փաստորեն, ԱԱ ապահովման գործընթացի մոնիթորինգը ոչ միայն գործիք է ազգի և պետության արտաքին ու ներքին սպառնալիքներից ու վտանգներից պաշտպանվածության ուսումնասիրության և գնահատման համար, այլ նաև ազգային անվտանգության ապահովմանն ուղղված որոշումների կայացման գիտական հիմք: ԱԱ մոնիթորինգի հիմնական մեթոդներն են՝

- գործոնային վերլուծությունը,
- համակարգային վերլուծությունը,
- բովանդակային վերլուծությունը,
- ԱԱ մոնիթորինգի ցուցանիշների ներառումը գործադիր իշխանության մարմինների վիճակագրական և այլ հաշվետվություններում,
- պետական կառավարման մարմիններում մշակված՝ ԱԱ-ին վերաբերող տեղեկատվական-վերլուծական տվյալների օգտագործումը:

ՀՀ ԱԱ մոնիթորինգի միջոցով պետք է իրականացվի ՀՀ ԱԱ-ի վրա ազդող հիմնական գործոնների ուսումնասիրություն և վերլուծություն՝ ԱԱ ռազմաքաղաքական, սոցիալ-տնտեսական և տեղեկատվական ենթահամակարգերի վրա ազդող կառավարչական որոշումների հետևանքների կանխատեսման և ԱԱ տեսանկյունից պետական կառավարման համակարգի կատարելագործմանն ուղղված առաջարկների մշակման նպատակով: Այսպիսով, ԱԱ մոնիթորինգի արդյունքները պետք է ծառայեն՝

- ԱԱ սպառնալիքների և վտանգների վերհանմանը, դրանց աճի և ոչ ցանկալի փոփոխությունների միտումների կանխորոշմանն ու դրանց դիմակայման և չեզոքացման միջոցների որոշմանը,
- երկրի պետական քաղաքական ղեկավարության կողմից տարբեր ոլորտներում ընդունվող ԱԱ ապահովմանն ուղղված որոշումների հիմնավորմանը,
- ԱԱ ապահովման ինստիտուցիոնալ-գործառնության մոդելի և ԱԱ ապահովման համակարգի կատարելագործմանն ուղղված առաջարկությունների մշակմանը,

- ԱԱ ոլորտում ընդունված որոշումների սոցիալական հետևանքների կանխատեսումների իրականացմանը՝ հասարակական գիտակցության կառավարման արդյունավետության տեսանկյունից:

Կապված 2007թ. ընդունված ԱԱ ռազմավարության ընդունման հետ՝ ՀՀ ԱԱ ապահովման գործընթացը տեղափոխվել է որակապես նոր հարթություն: Ի կատարումն «ԱԱ ռազմավարությունը հաստատելու մասին» ՀՀ նախագահի հրամանագրի (ՆՀ-37-Ն)՝ ՀՀ կառավարությունը սկսել է ԱԱ ռազմավարության ապահովմանն ուղղված պետական գերատեսչությունների իրականացնելիք գործողությունների ծրագրերի մշակման և հաստատման գործընթացը [3]:

Ներկայումս ՀՀ ԱԱ ապահովման տեսանկյունից կարելի է բացթողում համարել այն, որ ԱԱ ապահովման գործընթացի մոնիթորինգը դրված չէ համակարգային հիմքերի վրա: Այսինքն՝ դեռևս չի ստեղծվել ԱԱ մոնիթորինգ իրականացնող մարմին՝ համապատասխան ռեսուրսներով ու լիազորություններով, որը կկարողանա համակարգել ԱԱ-ին վերաբերող տեղեկատվության հավաքագրման գործընթացը և դրանց վերլուծության արդյունքները ներկայացնել ԱԱ ապահովմանն ուղղված կառավարչական որոշումների ընդունման գործընթացում ներգրավված պաշտոնատար անձանց: Հաշվի առնելով ԱԱ ապահովման համար անհրաժեշտ ռեսուրսների սահմանափակ լինելը՝ կարելի է ասել, որ այս խնդիրն առավել մեծ կարևորություն ունի նշված ռեսուրսների խնայողության և արդյունավետ օգտագործման տեսանկյունից: ԱԱ մոնիթորինգը հնարավորություն կտա հստակեցնել տվյալ ժամանակահատվածում ԱԱ ապահովման առաջնահերթությունները և ըստ այդմ կատարել ռեսուրսների համապատասխան բաշխում: ԱԱ մոնիթորինգի վերահսկողական գործառույթները թույլ կտան նաև հնարավորինս խուսափելով ԱԱ ապահովման գործընթացում առկա գործառույթային կրկնություններից՝ բարձրացնել դրանց արդյունավետությունը և ապահովելով այդ գործառույթների լիարժեք իրականացում՝ բարձրացնել ԱԱ ապահովման մակարդակը:

Այսպիսով, մոնիթորինգը, ԱԱ ապահովման գործընթացի ուսումնասիրության մեթոդ լինելով, ժամանակի պահանջ է: Մոնիթորինգի իրականացումը տեղեկատվական տեխնոլոգիաների և մաթեմատիկական, համակարգային ու գործոնային մոդելավորման կիրառման հիման վրա կտրուկ կբարձրացնի ԱԱ մակարդակը:

ԱԱ ապահովման մոնիթորինգի իրականացման համար անհրաժեշտ

է կատարել մի շարք կազմակերպչական և գիտամեթոդական քայլեր, մասնավորապես.

- իրականացնել գիտահետազոտական աշխատանքների համալիր՝ ուղղված անվտանգության միջավայրի հնարավոր փոփոխությունների սցենարների մշակմանը և կուտակմանը,
- անվտանգության միջավայրի հնարավոր փոփոխությունների սցենարների շրջանակներում իրականացնել տարբեր մակարդակի անվտանգության ապահովման մաթեմատիկական մոդելների մշակում և կուտակում,
- իրականացնել իմիտացիոն մոդելավորման գործիքային համալիրի շրջանակներում տարբեր մոդելների կիրառման համար անհրաժեշտ ծրագրերի մշակում և կուտակում,
- մշակել ԱԱ տարբեր ոլորտների անվտանգության ապահովման մակարդակը բնութագրող քանակական և որակական ցուցանիշների համակարգ:

Նշված քայլերի իրականացման համար, անկասկած, անհրաժեշտ է միջգերատեսչական կոորդինացնող մարմին, որպիսին, մեր կարծիքով, կարող է հանդես գալ ՀՀ նախագահին առընթեր ԱԱ խորհուրդը՝ իր աշխատակազմով: Դրա համար, նախնառաջ, անհրաժեշտ է ԱԱ խորհրդի աշխատակազմին, բացի ԱԱ խորհրդի աշխատանքների կազմակերպման գործառույթներից, օրենսդրորեն վերապահել նաև ԱԱ ապահովման գործընթացի մոնիթորինգի իրականացման լիազորություններ և որպես գործունեության հիմնական նպատակ ամրագրել ԱԱ ապահովմանն ուղղված տեղեկատվական-վերլուծական աշխատանքների իրականացումը:

Այսինքն՝ կարելի է ասել, որ ԱԱ ապահովման համար անհրաժեշտ կառավարչական ներգործությունը, հիմնված լինելով պետական իշխանության վրա, պետք է ապահովված լինի տեղեկատվական-վերլուծական աշխատանքով, որն էլ, մեր կարծիքով, պետք է իրականացնի ԱԱ խորհուրդը:

ԱԱ ապահովման մոնիթորինգի իրականացման գործառույթի պատվիրակումը ԱԱ խորհրդին գիտական և համակարգային հիմքերի վրա կդնի պետական կառավարման գործընթացը տարբեր ոլորտներում ընդունվող կառավարչական որոշումների արդյունավետության տեսանկյունից և հնարավորություն կընձեռի համաձայնեցնել, համակարգել և իրականացնել դրանք՝ ԱԱ համակարգի առավել արդյունավետ պաշտպանության նպատակով:

ԱԱ մոնիթորինգը պետք է իրականացվի հետևյալ հիմնական ուղղություններով՝

- ԱԱ ապահովման գործընթացի զարգացման սցենարների մշակում և կանխատեսումների իրականացում,
- ԱԱ վտանգների ու սպառնալիքների չեզոքացմանն ուղղված արդյունավետ առաջարկությունների մշակում,
- Ժամանակի իրական ռեժիմում ԱԱ ապահովման մակարդակի գնահատում,
- ՀՀ ազգային շահերի և այլ երկրների ու միջազգային կազմակերպությունների շահերի համադրման տեսանկյունից ընթացիկ տեղեկատվության վերլուծություն և մշակում,
- իրավասթեղակալական ակտերի, նախագծերի փորձաքննություն ԱԱ տեսանկյունից:

Արդյունքում՝ ԱԱ մոնիթորինգի սխեման կարելի է ներկայացնել որպես հիերարխիկ կառուցվածք, որի բարձրագույն օղակը վերահսկողական-խորհրդատվական մարմինն է, որին ԱԱ ապահովման գործընթացում ներգրավված պետական ինստիտուտները պետք է տրամադրեն համապատասխան տեղեկատվություն ԱԱ համակարգի վիճակի վերաբերյալ: Այդ տեղեկատվության վերլուծությունը թույլ կտա գնահատել, կանխատեսել և համակարգել ԱԱ ապահովման գործընթացը և ընդհանուր առմամբ մշակել ԱԱ համակարգի զարգացման ռազմավարություն:

Այսպիսով, մոնիթորինգի ուսումնասիրության առարկա են հանդիսանում ԱԱ գործոնները, դրանց վերաբերյալ տեղեկատվությունը և փորձագիտական գնահատականները, ինչը նպատակ ունի բացահայտել ԱԱ սպառնալիքների ու վտանգների առաջնահերթությունները, ինչպես նաև կատարել ԱԱ վիճակի փոփոխությունների կանխատեսումներ: Նշված տեղեկատվական վերլուծական աշխատանքների իրականացման համար անհրաժեշտ է ստեղծել տեղեկատվական բազա, որը պետք է ներառի՝


- ընթացիկ տեղեկատվություն ՀՀ ներքին և արտաքին անվտանգության, ինչպես նաև միջազգային անվտանգության վերաբերյալ,
- Ազգային վիճակագրական ծառայության կողմից մշակվող տեղեկատվությունը,
- ԱԱ հիմնախնդիրներին վերաբերող գիտահետազոտական աշխատանքների արդյունքները,
- ԱԱ-ի վրա ազդող գործոնների վերաբերյալ տրված փորձագիտական գնահատականներն ու վերլուծությունները,

- ԱԱ ապահովման գործընթացի գործոնային մոդելի միջոցով ստացված արդյունքների մեկնաբանում:

Արդյունքում՝ ԱԱ խորհրդի կողմից իրականացվող ԱԱ ապահովման գործընթացի մոնիթորինգի հիմնական խնդիրները կարելի է ներկայացնել հետևյալ տեսքով՝

- ԱԱ հիմնախնդիրներին վերաբերող տեղեկատվության հոսքերի համակարգման միջոցով տեղեկատվության վերլուծություն և պահպանում,
- ԱԱ հիմնական գործոնների ու ցուցանիշների փորձագիտական գնահատում և ԱԱ ապահովման ինստիտուցիոնալ-գործառության մոդելի ստեղծում և օպտիմալացում,
- ԱԱ ապահովման գործընթացի տարբեր սցենարների մշակում,
- ԱԱ ապահովման գործընթացի վրա ազդող հիմնական գործոնների, ցուցանիշների բազայի ստեղծում և պարբերական թարմացում,
- ԱԱ ապահովման մակարդակի բարձրացմանն ուղղված առաջարկների մշակում և այդ ուղղությամբ կանխատեսումների իրականացում,
- ԱԱ ապահովման առաջնահերթությունների սահմանման հիման վրա սպառնալիքների և վտանգների փոփոխության բացասական միտումների հայտնաբերում և նախագուշացում,
- ԱԱ-ին վերաբերող որոշումների սոցիալական հետևանքների վերհանում:

Նշված խնդիրների իրականացման համար անհրաժեշտ է ունենալ ԱԱ խորհրդի աշխատակազմ՝ համապատասխան կազմով և կառուցվածքով, որը հիմք ստեղծելով ԱԱ ապահովմանն ուղղված որոշումների կայացման համար՝ ԱԱ խորհրդին թույլ կտա համակարգել ԱԱ կառավարման գործընթացը: ԱԱ խորհրդի աշխատակազմի կառուցվածքի սխեման կունենա հետևյալ տեսքը՝



* տեղական ինքնակառավարում

ՀՀ ԱԱ խորհրդի աշխատակազմի հնարավոր կառուցվածքը

ԱԱ խորհրդի աշխատակազմի կառուցվածքում ներառված են կառուցվածքային ստորաբաժանումներ՝ վարչություններ, բաժիններ և քարտուղարություն, ինչպես նաև աշխատակազմի ղեկավարին կից գիտական-խորհրդատվական խորհուրդ:

Աշխատակազմը ղեկավարում է խորհրդի քարտուղարը, որն ունի երկու տեղակալ, որոնց պաշտոնի նշանակում և պաշտոնից ազատում է ՀՀ նախագահը՝ ԱԱ խորհրդի քարտուղարի առաջարկությամբ: Աշխատակազմի ղեկավարի տեղակալները համակարգում են աշխատակազմի աշխատանքները, խորհրդի առջև դրված խնդիրների լուծման նպատակով՝ իրենց հանձնարարված բնագավառներում:

ԱԱ յուրաքանչյուր ենթահամակարգին (ռազմաքաղաքական, սոցիալ-տնտեսական և տեղեկատվական անվտանգություն) վերաբերող տեղեկատվության հավաքագրման, վերլուծության և պահպանման աշխատանքների կազմակերպման, ինչպես նաև ԱԱ ապահովման գործընթացի վրա ազդող հիմնական գործոնների բացահայտման, ցուցանիշների բազայի ստեղծման և պարբերական թարմացման համար աշխատակազմի կառուցվածքում ներառված են համապատասխանաբար ռազմաքաղաքական անվտանգության, սոցիալ-տնտեսական անվտանգության և տեղեկատվական անվտանգության վարչություններ:

Ռազմաքաղաքական վարչության մեջ ընդգրկված են արտաքին քաղաքականության և անվտանգության, պետական կառավարման ու ՏԻ և ռազմական անվտանգության բաժինները: Սոցիալ-տնտեսական վարչությունը ներառում է սոցիալական անվտանգության, տնտեսական անվտանգության և էներգետիկ անվտանգության բաժինները: Իսկ տեղեկատվական անվտանգության վարչության կազմում ընդգրկված են տեղեկատվական անվտանգության, գիտակրթական անվտանգության և հոգևոր-մշակութային անվտանգության բաժինները:

ԱԱ հիմնական գործոնների ու ցուցանիշների փորձագիտական գնահատման և ԱԱ ապահովման մոդելի մշակման ու օպտիմալացման, առաջնահերթությունների սահմանման հիման վրա ԱԱ ապահովման մակարդակի բարձրացմանն ուղղված առաջարկների մշակման և այդ ուղղությամբ գիտական հիմքի վրա կատարվող կանխատեսումների իրականացման համար աշխատակազմի կառուցվածքում ընդգրկված է նաև ռազմավարական պլանավորման և կանխատեսումների վարչություն: Այն ներառում է կանխատեսումների և վերլուծության, պլանավորման և մոդելավորման բաժինները:

ԱԱ ապահովման գործընթացը համապատասխան օրենսդրական դաշտով ապահովելու, ինչպես նաև առկա օրենսդրությունը ԱԱ ապահովման գործընթացի առաջնայնություններին և նպատակներին համապատասխանեցնելու ուղղությամբ առաջարկությունների մշակման և ԱԱ խորհրդի որոշումների կիրարկումն ապահովելու համար աշխատակազմի կառուցվածքում ներառված է իրավաբանական վարչությունը, որի կազմում առկա են օրենսդրական բարեփոխումների և վերահսկողության ու իրավաօրենսդրական ակտերի փորձաքննության բաժինները:

Աշխատակազմի բնականոն գործունեության ապահովման համար անհրաժեշտ աշխատանքային պայմանների ու փաստաթղթաշրջանառության ապահովման, ԱԱ խորհրդի նիստերի կազմակերպման աշխատանքների իրականացման համար աշխատակազմն ունի նաև քարտուղարություն, որը գտնվում է աշխատակազմի ղեկավարի անմիջական ենթակայության տակ:

Աշխատակազմի գործունեության ընթացքում առաջացած հարցերի քննարկման և աշխատանքների գիտամեթոդական ապահովման համար աշխատակազմի ղեկավարին կից գործում է գիտական-խորհրդատվական խորհուրդ: Խորհուրդն իր աշխատանքներն իրականացնում է նիստերի միջոցով, որոնք հրավիրվում են ըստ անհրաժեշտության: Բացի խորհրդի մշտական անդամներից, որոնք ներկայացնում են ՀՀ նախագահի աշխատակազմը, ՀՀ ԱԺ-ը, ՀՀ կառավարությունը, ՀՀ ԳԱԱ-ն, քննարկվող հարցի առանձնահատկություններից կախված՝ աշխատակազմի ղեկավարի առաջարկով գիտական-խորհրդատվական խորհրդի նիստերին կարող են հրավիրվել նաև տվյալ հարցին քաջատեղյակ այլ մասնագետներ:

Այսպիսով, մեր կողմից առաջարկված կառույցի ստեղծումը և հետագա զարգացումը պետք է հանդիսանա ՀՀ ԱԱ կառավարման համակարգի ձևավորման գործընթացի եզրափակիչ փուլը, որը նաև ցիկլայնություն կհաղորդի ԱԱ կառավարման ողջ գործընթացին:

Փետրվար, 2008թ.

Աղբյուրներ և գրականություն

1. «Մենեջմենթ» // Յու. Մ. Սուվարյանի ընդհանուր դեկլարությամբ և խմբագրությամբ, «Տնտեսագետ», Ե., 2002:
2. Курдюмов С.П., Малинецкий Г.Г., Медведев И.Г., Митин Н.А., Нелинейная динамика и проблемы прогноза// Безопасность Евразии, №2, 2001.
3. «Հայաստանի Հանրապետության ազգային անվտանգության ռազմավարություն», «Հայկական բանակ» ռազմագիտական հանդեսի հատուկ թողարկում, 2007:

КОНТРОЛЬ ЗА ПРОЦЕССОМ ОБЕСПЕЧЕНИЯ НАЦИОНАЛЬНОЙ БЕЗОПАСНОСТИ (прогноз возможных ситуаций)

Сюник Тадевосян

Резюме

Любая страна должна иметь современную и гибкую систему национальной безопасности, которая позволит эффективно реализовать процесс обеспечения национальной безопасности (НБ). Эта система должна вовремя реагировать на новые вызовы с помощью использования мониторинговых исследований.

Мониторинг обеспечения НБ, по сути, является не только инструментом по изучению и оценке состояния защищенности жизненно важных интересов личности, общества и государства от внутренних и внешних вызовов, но и научной основой для принятия оптимальных решений по приоритетным направлениям обеспечения НБ страны.